

四庫全書薈要·乾隆御覽本

集部

御定歷代賦彙卷七十五

宮殿

朝元閣賦

以高抗山頂升
覽清遠為韻

唐
孫翊仁

神之本也以朝為大乾之德也以元為高合二美以制
閣俾萬人兮不勞何哉彼朝元之為狀厥高因於巖嶂
爰業兮初謂湧於山巔崔嵬兮又謂居於天上崇崇之
勢博敞宏壯斜窺渭北笑玉樹而徒空俯對終南與金

闕而相抗迴出象外信非人間陽烏乍轉以迴翼翔鷗
不逮而空還七聖同遊罷還襄野萬國以會自是塗山
既而玄冬啓景六合清迴法駕行幸於溫泉羽旆駢羅
於高頂帝乃躋稜層考休徵天之動日之升馳繚垣以
望窅窳開闔闔而越凌兢視遠如邇臨高可憑於以旁
眺於以迴覽牕前桃實在方朔之深知閣上鳳巢表帝
軒之聖感昔秦皇學道漢主長生祈年既築望仙復營
人既勞止事卒無成豈比夫向背山澤密邇王城池八

水而下臨無地階重巖兮上摩太清至若早霜啓色積
雪初晴壯太山之日觀比天台之赤城信我后之攸處
與神仙之混并嗟乎登高作賦十上何晚題陸雲之閣
吾道應行薦揚子之文其事不遠

朝元閣賦

以高抗山頂升
覽清遠為韻

唐

闕名

皇帝於驪山之上起仙閣於神皋得凌雲之體勢彰考
室之劬勞冠千峰而迴出聳百尺之彌高蓋取惟清惟
淨而藉乎以遊以遨千碧霄而宏壯依絕頂而高抗仰

之者目眩心驚俯之者興逸神王納烟霞於袖裏看日
月於掌上改山為會昌之號建福無疆題閣取朝元之
名升天有望徒觀其出地表俯人寰飛重簷之日下疊
千拱於雲間金鋪燭耀玉碣苔斑蓮井雕梁之彩錯綺
牕網戶之虛閒屹屹然下臨千仞亭亭然遠對黃山若
乃初旭澄霽則勢能孤迥早霞初照如赤城在天台之
峰積雪未消若銀臺處蓬萊之頂每歲農務隙寒事興
聖人之玉輅是動金梯是凌限三休而爰至歷重檻而

方憑寒雁正來下秦山之八水暮煙初起繞漢家之五陵以人心為心則遇物多感以真趣為趣則放情玄覽豈不由登此而存所誠處此而無所營方抗隱而述物覺山空而益清七聖不迷勝軒轅襄野之遊豫萬靈畢集若夏禹塗山之會成昔周日之中天擅美秦代之阿房著名既煩費於徭役復荒淫於性情豈與夫險不恃兮高不傾囂塵絕兮虛白生光一人之息偃歷千載而彌遠者同日而言哉

朝元閣賦

以高抗山頂升
覽清遠為韻

唐錢起

上將恢帝宇壯神臬斷景山之松用而有節感子來之
衆役不告勞成仙閣之弘敞配紫極之崇高先是徵規
模宏大壯經始聖迹責成梓匠當桂戶而八水悠遠植
玉階而千巖相抗升陽烏於赤霄之表棲玉兔於翠微
之上可以吞貝闕壓崑閬盛矣哉亦神明之化也不可
得而稱狀觀乎儉以示德高即因山虹梁天近丹陛雲
還漢武求仙望蓬萊於海上吾君有道致方士於人間

厥構既崇其寧惟永正色深沉於木末浮光嶙亂於山
頂如翬斯飛獨出於頰農務暇霜氣澄天門闢龍輅升
俯人煙於萬井小雲樹於五陵天臨宇宙日照黎蒸是
時也靈仙響集品物交感因高載著於人風有象寧遺
於睿覽聖人垂化稽古上清彼會昌之構宇得朝元之
美名不奪穡地知庶心胥悅高標靈阜表聖壽長亨襟
懷動植指掌寰瀛將九圍載廣與三光克明斯乃棟宇
之大也雖前史莫之與京夫如是古之濬城隍飭宮苑

孰比我君居高而致遠

初日見朝元閣賦

以赫臨曉雲高
出蒼翠為韻

唐

郭遵

新豐之路兮朝元有歸客見初陽於東嶺照層閣於南
陌惟閣也憑高不傾惟日也臨下有赫既瞳矇而延燭
曷埃壻之能隔陽烏之翼兮若駐禁林羲和之轡兮若
頓高岑蒼蒼之曾纔辨杲杲之光稍臨發璇題之麗色
開玉戶之宿陰浮輝外融峻勢無不呈其壯引曜中朗
邃宇無以閔其深於原之表揭雲之杪映朱檻以充融

凝粉垣而晶皎司晨而見異星樓之麗霄質明乃光殊
日觀之生曉陽彩舒文昭然可分晡拂簷之夜霰辨出
棟之朝雲類列仙降真祥光繇幕疑大君臨御瑞氣氤
氲諒清旭之初起非反照之猶曛日惟至麗閣亦蓋高
竦莫大之標洪纖奚比委無私之照巨細何逃是以詭
狀摩天殊姿詳悉欒蚪欲動謂起蟄於春光井蓮倒披
若爭開於夏日的皪交映岩堯上軼不殊南榮之明奚
獨東方之出閣之峙矣于彼高岡閣之麗矣于彼朝陽

據厚載於秦雍鄰顯氣於穹蒼豈比崑崙之山俟燭龍
銜耀鳩鵲之觀俟金波寫光孰若列皇都之次鎮王畿
之位近白日之貞明總離宮之蒼翠祥雲不散意往仙
如存耀景每臨誠望幸可冀因徘徊而寓目遂含毫而
寫意

石渠閣賦

元
劉性

維漢七世厚澤深仁乾坤清兮瑩玉宇宙郁兮陽春宜
文運之益昌當熙洽而彬彬自鄴侯之入關收圖籍於

先秦藏以石渠之固鑄以金匱之珍異孔壁之斷爛匪
汲冢之怪神斯石渠之為閣彰萬代之斯文想其深簷
跂翼層構飛翬攀斗柄兮欲近俯過鳥之下飛雲擁寒
蟾而金莖影轉風連溥露而玉漏聲遲金馬立兮重門
鷓鴣鳴兮高枝渭水素以縈練秦山翠而浮眉隔人間
之風日近天上之壁奎極目兮千里心曠兮神怡並天
祿以宮堯隔未央之呆愚肅以禁籞之清嚴誠於講論
而相宜有若夏侯之家學梁丘之經師莫不欽承聖詔

環列經帷博習乎四聖之易深考乎六義之詩典謨明
帝王之盛禮樂傳三代之遺窮春秋之微旨訂三傳之
是非披竹帛而舒卷追簡策而論思於以傳往聖之至
教於以廣大漢之弘規考文則極其辨博析理則造其
精微始參差以異序卒爛熳而同歸斯石渠之建閣同
漢德之巍巍嗟惟炎漢文運方張或天資明達而詩書
安事或躬行清靜而禮樂未遑逮世宗之統一始六經
之表章於皇中宗文明之祥通經書之大義既綜核於

權綱百工之伎藝咸精其能而詞賦之末學各盡其長
矧五經之行世與日月兮齊光宜甘露之明詔極皇猷
之昭彰彼麒麟殿之子雲惟諸子之讐勘天祿閣之歆
向惟九流之校量徒藝文之是事豈經術之精詳惟白
虎與東觀枕襲美而傳芳洪惟盛世登崇俊良經籍藏
於祕府禮樂具乎太常見五經之行世躋風化於虞唐
而談經之閣如石渠者與天地同其久長矣

石渠閣賦

元
吳
浩

皇道於穆人文載熙觀炎德之神聖宣重光於九圍繫
石渠之清濶聳飛閣之喬基蔚翰林其雲起萃儒雅其
日躋羌朋來而簪盍究廣大於精微若稽厥初赤帝肇
造星井應符青文斯兆攬明都之壯觀宮未央其居要
於是度新宇而北面處高明而密宥瞰中宸於天表播
休烈而垂後其始創也鄒侯資畫般匠騁能榘桷程竒
杞梓掄精運乾規而坤矩紛畫構而夕營嘉子來而翕
赴乃不日而獻成乃其芬棨馮虛芝栢凌飈層構百尋

萃律岩堯渤解蓬萊之峻涉中天積翠之高標決雲漢
以為章兮翼瑤光而上招搖爾其湛露流津醴泉吐液
御氣淵涵沛恩洋溢尊淳源於委注疏靈派以潛出炯
水碧以靜波鑿瑤瓊於磐石衍漪漣之芳潤散熙明之
渥澤若乃宅居爽塏成美奐輪寶篋儲珍輿圖閱文存
帝道於方策志皇綱於典墳炳虹氣以夜輝耀神光於
旭暉暨夫七葉繼體紀年甘露期陳常於時夏度憲章
而稽古吐絲綸之渙汗命討論於掌故徵義圖於施孟

揆周雅於齊魯較典禮於曲臺誦聖謨於夏傳考高赤
之專門發洙泗之歸趣蕭生博洽昔延譽於東海梁丘
淵綜始擅聲於少府叢大雅之弘達時言言而語語暢
思風於骨髓流言泉於肺腑別同異於錙銖計淺深於
函汝決肯綮於斲刀析盤錯於柯斧或初華而後合或
始違而終取知一貫之同歸慨多歧之失據恢表章之
要道麗鴻猷於海宇煥文明以飾治來會極於王路斯
則石渠之令制漢道之昭著者也蓋惟地隆居要道在

昭時奎祥曜晶離照揚輝宇宙啓斯文之運烝黎均爾
德之歸所以統聖緒於先烈計皇極於明時登八表於
仁壽縣億代之鴻禧維今泰道上昭聖明御天睿和高
明深仁溥淵金華星拱東觀珠聯時敏孜孜而業業天
章本本而原原顧楚產之微陋懷石渠之濬源冀涵濡
乎膏澤汎青霞兮上玄儻風雲其幸會依棟桷之夤緣
贊經綸而道廣隆潤色而化宣其將仰麗正之大明頌
聖功於萬年矣

石渠閣賦

元文桂發

天風翩翩明河娟娟客有振袂而前大人先生呼而語
之曰石渠講經之事子能賦否客跽而賦曰魏乎高哉
炎漢之建石渠也熒熒煌煌冠乎未央聳朱甍而鳳翥
起雲構而鸞翔倚丹梯於碧落抗浮柱於銀潢結朱霞
之紅彩蔚翠霧之寒光遠而望之玲瓏崖壑覆終南之
蒼蒼俯而視之晶雲蕩瀟引渭水之洋洋金鋪爛其浴
月瑤砌燦以凝霜既峭拔以宏敞抑奧杳以清涼石痕

斑其苔蘚渠波鳴兮琳琅鏘羣英兮燕集昭大漢之文章
章乃開東壁之府乃蒐天祿之藏搜遺編而黽勉撫前
躅以傍徨探石渠之經始實將以繼殷周而追虞唐也
猗歟孝宣慨思前王念高帝之創業祀孔聖而肅將令
詩書之末事摹弘遠而源長惠除挾書之律文慕清淨
之方固恭修之靡怠何稽古之未遑逮我孝武奮志發
揚大修辟雍肇開明堂粵表章於經術措紳瀚其回翔
何申公之始見徒一語而弗詳彼仲舒三篇之策庶幾

傳說之告商爰二子之遽斥雜以黃老申韓之披猖大道寥其益遠古訓晦而弗彰誠余心之痛悼中抑鬱而慨慷受命羣儒講經石渠事業同而代異句律夸而談虛理何隱而不索辭何疑而不祛於是傳道弟子褒衣之徒捧詔踴躍裁冠曳裾府府于于雅雅魚魚陟斯閣而遠覽咸游心乎邃古之初或侃侃而論難或揚揚而發舒或昭灼於獨見或漂泊於衆煦尋墜緒而莫考守訛畫而莫勸口欲吐而不合心徒醉而如愚誠無以副

聖明之訪將何以敷奏於承明之廬然則漢諸儒之辨
駁其事亦云勤矣既而請於先生曰石渠之事則弟子
欣聞命矣抑漢諸儒之講經果有益於後來乎先生曰
吁子來前折楊不奏於黃鍾之側嫫母不入於西施之
室董生春秋括於水旱災異之見夏侯尚書膠於洪範
五行之變詩不本情性而論五際易不原太極而拘卜
筮禮經大本之不講樂書造律之異議不拘之以筭傳
則潛之以識緯此則漢儒說經之癖前後一律非特無

以稱上意且徒以惑來世也方今聖皇御極天下文明
廊廟所師皋夔稷契山林所學周張朱程吾子抱豹變
之文久矣如或知爾其何以奉當今之所欲聞客拜手
稽首而歌曰五雲爛兮大明之宮帝學濬哲兮允執厥
中經筵肅穆兮大道為公望闔闔而稽首兮雲冉冉以
從龍

麒麟閣賦

元
楊維禎

壯西京之翼翼兮觀宮闕之穹窿鬱鬱雲雨以上出兮見

傑閣之橫空層覆隔乎光景兮虛櫺敞乎八風聯天祿
之北兮翼未央之東肇鄴侯之經始兮繼武皇之重規
獲獨角之奇獸兮遂被號為扁題懷皇度以增大兮至
甘露之丕承曩單于之倔強兮今匍匐而來庭呼萬歲
而稱臣兮實雪恥於白登余何修而至此兮實賴余之
股肱既崇爵以報功兮復審象以度之儼洋洋乎在上
兮聳具瞻之在茲來遠人之快覩兮曾不啻鳳麟之與
景星後余生以尚論兮將其某以指評若博陸之稱首

兮胡獨氏而不名寵之以殊禮兮迺冠屨之自陵何末
路之少恩兮顧寡妻之弗刑偉金城之老臣兮實漢家
之叔虎富平龍頷之論功兮追平嬰之智武丙魏洋乎
其有聲兮並謀謨以濟世何毅者之不弘兮或含弘而
不毅陽城宗國之良兮建平比功於朱虛少府得乎易
學兮僅以筮而幸之太傅貞而不撓兮失保躬之明哲
蹇穹廬之老使兮紛獨有此姱節嗟丹青之所畫兮何
以過吾子卿何列序之特卑兮曾未諗其殿陛自屬國

之見薄兮吾以恨霍氏之不情曰黃于與朱尹兮又遺
棄夫丹青傷靈修之雜伯兮實未盡乎典刑嗚呼我思
古之明良兮寫聖經之畫工文謨武烈去之千載兮猶
若見其聲容逮書之以旂常兮銘之以鼎鐘歎忠信之
已薄兮重輪奐之尊崇雖子雲之追頌兮敢三代其同
風粉墨忽其蕭瑟兮曾歲月之去幾矧恩失於保終兮
名先閣而已毀迨永平之追迹兮繼雲臺之峻嶒天策
之懷功兮兀煙閣之凌兢或椒房之掩美兮或逆德之

齊名紛雜糝夫芳穢兮羌有玷兮丹青嗚呼麒麟燕麥
兮銅駝棘荆曰臺曰閣兮雲煙滅冥吾將求亮天功於
二十二人之目兮耿不沒之寒星

凌煙閣賦

有序

元岑士貴

序云貞觀十七年二月詔圖畫趙公長孫無忌等二十
四人於凌煙閣冠劍崢嶸照耀金碧朝野傳誦瞻望踴
躍惟此閣深列紫禁傑出青霄萬幾之暇游矚所憩四
年之春突厥既平上皇召上與貴臣及諸王妃主置酒

於斯縱閒為劇極歡而罷豈特國家盛事實為凌烟之
寵蓋十有四年矣今則繪畫股肱燦爛昭列與甘露之
麒麟永平之雲臺相輝前後而功名之盛抑又過之臣
不敏辱綴鴛行贊揚之私實過常情敢拜手稽首而獻

賦曰

皇家之作室也爰謀爰契負陰嚮陽紫閣當前澧水流
長指周漢之故址相山澤而為疆含元蔽於前宣政峙
於後弘文立於左集賢立於右千室翬飛萬礎鼇負呼

吸八絃籠絡九有觀凌煙之特出勢上摩於蒼昊映景
星之燦爛護卿雲之繽紛動清漢之微瀾留落照之餘
曛秦山逶迤欲散而猶屬八川洄沄終合而忘分窮遠
睇而莫及萃都邑之孔殷觀其峻嵒衝雲飛閣宿霧瑩
白輝日丹紅濕露尋尺不遺於先畫高卑允合於良度
煥銀榜之爭輝映瑤階之列素雄梁萬鈞修楨千尋望
之杳杳即之沉沉周覽而日已昃旋步而宵已深陋蘭
室之非並挾芝館而忘臨擅玉禁之崇高凌金臺而蕭

森神堯倦勤歷數在秦出少陽而南面薄四海而帝臣
彼突厥之倔强屢跳擲於邊庭逮漠南之一掃始匍匐
而歸仁聿彰大孝雪我宿忿喜動上皇天語無隱謂白
登之莫報何渭橋之足憤爾乃命酒正飲膳夫醢馴龍
膾鱸魚召我元后曷不樂胥乘輿雲來貴臣于于列茅
土之子姓分湯邑之妃主共慶斯辰其從如雨乃登是
閣仰瞻天宇酒闌御樂樂罷而舞迭起為壽龍驤鳳舉
萬歲如雷天下父父美鴻聲之克永偉盛觀而無古茲

凌煙所以重於帝宸而不敢以褻處也獻陵既成神昭於天陟降是思遺跡凜然豈觀游之敢憑懷創業之乾乾載稽漢治孝宣有嚴表功麒麟以為世瞻至於東都亦圖雲臺曰將曰相文武奇才惟武德之御天閔四方之塗炭來龍虎之雲風迄佐平之時難功豈遜於蕭曹德或希於爽且備股肱與耳目寓圖畫以相燦上以慰九重之思下以傳萬世之贊猗與趙公用匪椒房贊成大計轉危而昌是冠羣賢遺烈煌煌惟房與杜潛龍之

素從容雅道同翊王度開國梁萊以永終譽鄭公秉直
金石為姿鑑亡言在日星昭垂英衛褒鄂氣酣百戰風
驅電掃用平九縣元王國族襄公帝親兩鄖宋夔郟盧
渝申曰邳曰胡曰莒曰陳屈突烈士永興儒臣惟茲二
十有四人文足以經緯邦家武足以勘定禍亂勁節雄
風高姿直榦古今相較軼於兩漢彼甘露之圖繪博陸
徒以擁立為首永平之追寫高密徒以先從為冠豈若
有唐明良相會足以扶元化而彰維翰也噫明君立極

制作有義崇德報功豈曰無意俾聖子神孫繼繼承承
懷治功而弗替思創業之孔勤知守成之匪易惟賢非
后不食惟后非賢不乂鶴乘軒而來怨鶴在梁而興刺
故必得夫才德出羣之士而後可與食天祿而共天位
也彼趨事赴功者每懷靡及安得不覩之而內媿宜想
像而取法亦模倣而自勵使致治而隆平而常若貞觀
君臣之懿豈惟愛冠佩之陸離棟宇之嵯峨以作一時
之觀美也頌曰帝式九圍義師雲飛既作霖雨萬物熙

熙聖不自伐表裏精微曰匪我德惟秉化機六子五行
寒暑陰暉二十四氣循環相依功成罔覺萬世巍巍
我進賢繡裳袞衣凜然丹青雷電孔威巨璞萬鎰不數
珠璣五鼎玉鉉不問采薇明良慶會古今云希邦家億
年宸居愈輝凡百君子德音莫違覩此垂勸永仰柔徽

凌煙閣賦有序

元孟泌

序云人君創一代之業必有一代之臣為之佐命故能
成不世之功有功之不報豈為人主之道歟此太宗所

以圖功臣之意也獲居是列者若趙公長孫無忌趙郡
元王孝恭萊成公杜如晦鄭文貞公魏徵梁公房玄齡
申公高士廉鄂公尉遲敬德衛公李靖宋公蕭瑀裴忠
壯公段志玄夔公劉弘基蔣忠公屈突通鄒節公殷開
山譙襄公柴紹邳襄公長孫順德鄒公張亮陳公侯君
集邾襄公張公謹盧公程知節永興文懿公虞世南渝
襄公劉政會莒公唐儉英公李世勣胡忠壯公秦叔寶
凡二十四人噫此可見御下之得其術使人思之而不

忘自非太宗之明哲其孰能之乎故美其事而賦其辭
曰

伊昔太宗之肇造區宇也豪傑林立俊乂雲從建丕基
於咫尺受大命於從容乃君臨之既久爰崇德而報功
固推恩以示衆實王業之攸隆是故丹青映日以炳煥
傑閣凌煙而崢嶸乃俾以像乃圖其形揭其衣冠表其
姓名對丹楹以皎潔照藻井以鮮明獲居是列何其有
榮原夫始於長孫無忌終於叔寶秦瓊茲廿四人者蓋

同心而戮力致恭而效誠或疏附而盡節或先後以時
行或奔走以承命或禦侮以舍生惟文武之羣材莫不
盡在於經營故能埽妖氛於四遠開上業於八紘革殘
隋於委靡為大唐之澄清及夫四方無虞萬國來庭道
行化美治洽德馨况褒賞之大典乃有國之常經若凌
煙之不作於太宗之心其能有寧乎嗚呼噫嘻帝王盛
事接武傳聲彼西漢之麒麟既著明於甘露而東漢之
雲臺又發揮於永平俱不若茲閣光耀前后其誰能與

之抗衡也哉

凌煙閣賦

有序

元方君玉

序云有翰林主人問於稽古愚生曰昔李唐之盛詔圖
輔臣於凌煙之閣者凡若干人皆功名之士也子賓於
鄉而來於京有志於是乎子曷為我悉數之生曰先儒
有曰志於道德者功名不足以動於心志於功名者富
貴不足以動其心公何不以道德者責我而乃以功名
者望於今乎雖然長者命我愚請悉賦其目而後以道

德之士復焉其辭曰

昔在太宗唐君推賢紀元貞觀十有七年乃褒輔臣圖
形凌煙有崇其閣巍峩引天麒麟不足以侔其大雲臺
不足以齊其肩雖慚茅土之制豈儷歌舞之妍秦府之
士瀛洲之仙趣詔良工俾以貌傳乃曰無忌勤勞女宣
討定突厥斥土於邊爾王孝恭為我近屬破敵夷陵西
循巴蜀玄齡如晦帷幄運籌爾庸為大克定九州徵爾
忠臣繩愆糾過勸行仁義謹言如在曰靖曰勛善汝戰

功或降蕭銑或俘世充定襄奮銳磧北稱雄有臣蕭瑀
勁草疾風世南議論蔚為儒宗秦瓊塵戰突然先鋒出
入行陣維屈突通公謹副靖論最攸同黎陽高麗汝亮
戮力谷渾高昌君集殊績敬德順德政會志玄儉紹知
節弘基開山女勲女業崎嶇兵間爵酬爾勞位稱爾德
分茅胙土享有封國君臣一體元首股肱予知以心予
見以形圖汝於是昕夕斯登聚精會神鳳凰景星予匪
爾極爾無或矜尚弼於予永觀厥成嗚呼君臣相得之

歡斯其盛歟至如趙國河間不以外戚近親而有嫌尤足見其宅心公正其視霍公之不名者為失君臣之體而馬援以椒房不與者不能以天下為公其可與斯並軌哉迨夫永徽致祭大中續圖固皆太宗有以啓之而輝耿青史矣夫何停昏仆碑貽譏於後邪謀怨望卒禍其身蓋以假仁義之君馭志功名之臣故致治之卑而濟於富貴者殆孔子所謂鄙夫不可與事君者矣若夫唐史所載止二十三人而呂溫作贊以為二十有四乃

黜侯張而不稱又進士廉以居其次喋喋小夫其何以
當褒貶之筆而窺春秋之藩籬蓋亦不足議也方今龍
飛在御君明臣良有若皋夔稷契者出而上擬於唐虞
以復於二十有二人亮天功之目是則所謂道德之士
曾何貞觀之所得而比量哉抑圖形凌煙之間孰與求
形傳巖之野而登之廟堂者乎綸音渙發慮科目不足
以盡多士申命有司訪求遺逸耕雲之夫釣月之叟孰
不歡欣鼓舞於敗垣破屋之下思出為邦家立太平之

基而致君為堯舜躋世於雍熙先生何不此之問而顧
有取於凌煙功名之卑主人笑曰子之言是也前言戲
之耳

宣文閣賦

元汪克寬

鼇極立兮時雍四海一人兮車書同作神京於燕薊貫
北辰乎天中懿聖皇之御極煥離明以當空復至元之
盛治繩神武而不隆淳風沕穆膏澤涵洪文燄烜赫乎
扶桑崦嵫之域仁聲駁沓乎濮鉛祝栗之封既而乾符

昭陳坤珍聿錫文德誕敷皇圖廣闢建傑閣乎中霄屹
大明之西北揭宣文之嘉名示弘模於萬億爾乃準水
臬恢鴻基公輸獻巧匠石殫思陶人運其埏埴玉工效
其雕幾豫章松柏翦千尋之夭矯金壁銀鏤致萬里之
瓌竒斧斤振鏗鈞之韻礮斲極精緻之宜四方子來經
之營之羌不日而告成儼崔嵬而峴巍觀夫峒堯嵯峨
嶕嶭瓌譎構複栴而重櫺邈希世而特出麗不踰奢儉
不及質璇題翠甍前繒綾而龍鱗蛟吻跼蹙真翬飛而

跂翼綺疏鏤列錢之玲瓏藻井粲芰荷之繪飾玉璫壁
英灌漑而凌亂隨珠明月照耀而恍忽瓊戶耀宇尹之
璀錯金鋪響連環之複疊稅嶮嶮而星懸拱衡縱而斗
折枝棠杈枒而斜據芝栴攢羅而戢毒曲折要紹而環
句層櫺礫危而岌業交龍纏楣橫飛虹之梁棟雙虬蟠
礎聳擎天之柱石朱楣詰曲而紫迴鉛砌晶瑩而燁燁
曠垣流丹以周繚翠柏樛枝而行立於是聖皇駕玉輅
張龍旂展乎國容輝乎皇儀望舒陪夫左馭屏翳導夫

前馳鳴和鸞之鏗鏘服袞龍之陸離御斯閣以問道闡
經幄之弘規帝幕高懸天顏孔怡列儒紳而進讀對黼
辰之嚴威舒絃帙之蟬蠹擴六籍之精微咏仁咀義聆
天語於羲昊言溫氣和陳古道於皋夔殫詞臣之忠蓋
恢聖學之緝熙內府頒竒珍於翠釜上方瀉甘醴於玉
卮和氣春融起天庭之黃色文星環拱映帝座之清輝
想夫聖躬聽講之餘臨眺徙倚接羲娥之耿光納穹垓
於無際東望則延春之閣崔嵬崢嶸橫絕天半宵貌觚

稜西瞰玉德秘殿皜曜月朗渺太液之輕漪涵天光而
混漾北瞻則萬歲之山集業嶠崿峩峩黃道之啓途列閭闔之九
南眎象魏峩嶺朱闕巉巖峩黃道之啓途列閭闔之九
關猗歟休哉卓彼斯閣曠古曷偶奠億代之基圖闢八
紘之戶牖萃鴻碩以講廟稽典墳於蚪蚪於以廣睿覽
之明極乎有截之垓埏廓聖德之聰達乎無垠之宇宙
思昔石渠天祿徒以貯簡編之糟粕麒麟凌煙祇以圖
羽翼之英雄曷若聖皇之制作宣人文於萬代致文治

於無窮彼弘文館聚四部之奧博白虎觀辨五經之異
同又烏足與聖世而比隆也哉乃舞蹈而歌之曰於穆
聖皇亶聰明兮雲漢昭回昭萬方兮嘉惠兆人臻義唐
兮傑閣中天討憲章兮鶴鷺章逢侍帝旁兮載稽典訓
研籀倉兮治功彌隆追虞唐兮人文宣朗貽億萬世而
無疆兮

奎文閣賦

有序

明李東陽

闕里宣聖廟舊有奎文閣以貯古今圖籍在大成殿之

前杏壇之南金章宗重建規制頗精國朝置衍聖公府其屬有奎文閣典籍一人凡朝廷有事於廟則禮迓香幣度於閣中以俟行事弘治己未廟災而閣存工既就緒殿廡闕麗皆加於舊按察僉事黃君繡謂閣獨弗稱欲撤而新之衆議譁然以為故物不可廢黃執之益力巡撫都御史徐公源實主之閣成高八丈有奇略與殿等棟宇相埒金碧交映向之譁者始翕然歸之稱全功焉東陽奉敕祭告乃登於茲閣欲賦其事未暇也徐公

既購書數百卷付行聖公聞韶令典籍孫世忠守之四
方藩郡聞而致者日益富徐公使告於予曰閣不可負
也乃為賦之

偉新廟兮既宮突高閣兮麗空海之右兮山之東極灑
澹兮爭從龍納沆瀣兮超鴻濛表日觀兮來天風忽秋
令兮始肅見奎星兮正中初徙倚兮欄前暫徘徊兮戶
外殿庭兮巍峩與茲閣兮相對亭碑藟兮林立壇屋隱
兮如蓋昔金源兮始構幾歲序兮更代歎軒楹兮未燼

紛瓦礫兮浮塏及輪奐兮鼎成藹冠裳兮咸聚覽舊跡
兮無餘撫孤根兮一檜吁嗟乎靡麗兮娉婷彼齊雲兮
落星悵望兮往營或籌邊兮見京夫豈若覩羹牆兮故
宅誦典則兮遺經宛蚪斗兮孔壁恍金絲兮魯聲感春
秋兮絕筆憶詩禮兮趨庭存奇文兮籀史脫虐燄兮秦
坑藉神鬼兮呵護閔山川兮精英乃有韋編兮竹簡石
墨兮溪藤汗牛充棟兮不可以數計又奚問兮何名幽
并兮青兗渺宮牆兮在眼前景行兮高山每為憾兮不

淺金書兮玉簡幸吾生兮未晚
朔秋霄兮愈泯恨夏日兮猶短
仰聖道兮彌高思古風兮漸遠
閱千載兮一時曾一慨兮不滿
睽逸駕兮可攀尚顏波兮在挽
噫噓噓靈有地兮傑有人賢有
象兮國有賓下厚土兮上高昊
軼倒景兮離塵紛博典冊兮窮
皇墳厲夕陽兮求朝閭豈徒析
蟲魚兮隱義辨豕亥兮疑真訝
雨粟兮天半降青藜兮夜分蓋
方舞干羽兮七旬徧絃歌兮八
垠占聚緯兮周髀聽園橋兮成
均殆將興兮吾道庶不朽兮斯

文魏乎高哉勢不可以極茲閣之名兮並列宿而俱存

文淵閣賦

明顧清

昔我文皇之統萬方也稽往古遵舊章攬衆維提要綱
謂六典之分雖倣於周禮而百揆之總實自於虞唐或
合而分或約而詳蓋不可無樞機之總疇咨之良也乃
眷斯顧禁垣之隅乃崇傑閣翼彼宸居錫文淵之嘉號
擢鑿坡之碩儒職論思於九重贊元化於中樞雖官曹
之未彰實名體之隱如此其大略也若乃其地則日華

之右丹鳳之東重門側啓複磴中通長廊後帶而龍矯
層城對起而繚虹非密勿之有關蓋不得以闖乎其宮
其中則有石渠之祕金匱之藏殷周訓誥洙泗典常班
馬之所叙述賈董之所鋪張奎光壁耀照灼乎虹梁其
前則有玉階珉砥仰接俯延文杏敷錦碧芸連錢瑤臺
植和鼎之弁銅池分並蒂之蓮承雨露之先及各獻巧
而呈妍其為制也邃密高閎沉深肅清黃扉豁其前敞
白間疎以通明案有朱墨庭無訟爭希夷乎紫宮逍遙

乎玉京邈風雨之何及時仙韶之遠聆乃有皋夔之輩
稷禹之倫大冠長劔鳴玉垂紳坐於兩楹敷帝猷而演
皇墳萬機倚以裁決庶績賴以經綸則有大官供帳天
府竒珍湛恩渥禮眷我儒紳至於睿思時凝事資訪逮
中貴傳宣東朝賜對日度晷而徐還步金屏而緩退其
或金根戾止玉輦幸臨略等級於堂陞咨失得於古今
每先過而陳善亦隨時而獻箴或都而俞或吁而喟言
皆可書動鮮有慝此則建閣以來累朝之盛節也嗚呼

漢開金馬賢俊雲蒸唐啓學館士誇登瀛徒取技於雕

蟲尚無關於大經然猶耀簡策熙鴻名而況地兼乎木

天之重名並乎鳳池之榮酌元氣以運四時敷王言而

令庶正宜乎萬事於此理萬化於此成而陶冶乎其中

者又可闕於頌聲邪於是拜手稽首敷陳其槩而系之

以歌歌曰五雲蔥蘢黃閣崇兮東壁流照光燭空兮維

帝伊佐志決道同兮政於此成民物豐兮有隆自今垂

之無窮兮

金馬門賦有序

元陳植

按漢書注未央宮四門金馬門其一也漢武帝得大宛馬鑄像立魯班門因改金馬或曰東門京作相馬法所鑄也公孫弘待詔金馬門在建元二年伐宛之事乃在元符之後非因宛馬明矣然愚意武帝好馬安知非得宛馬而使京鑄之耶馬史好奇又安知其不追書之耶乃本得大宛馬作金馬門賦其辭曰

玉關浩兮凱歌昆明澹兮息波宛駒躡月以西入金馬

倚空而嵯峨緊武皇之銳志奮拔山而誓河懷汗血於
萬里涉滇溟而揮戈偉丰毛之神異鼓天韜之至和鍊
棠谿之精粹範鳳臆而摩挲於是東門京技獻其奇巧
魯班門名易其傳訛此金馬為待詔之署所以名千載
而不磨也歟想是門也未央蟬聯軒軫旁午鼇脊摩空
璇題刷霧通羲娥之往還儼鳳鸞之軒翥聳牙撐柱兀
閭闔之中天洞豁豁衍闢崑崙乎太古忽金馬之當前
蹇躊躇而若顧磨瞳射影於銅鋪鑄鬣光浮於瓊戶天

關曉闕驚榮水之出圖月殿夜輝與銅仙而共語獸環
搖壓轡之玲瓏魚鑰振連錢之絡組爾其馴儀丹陛駐
彩黃扉匪銜杯之獻舞兀立仗而不嘶天矯九重之龍
出晶熒兩觀之翬飛至若虎柝嚴宵鷄籌報曉朝劔迎
花春旗拂柳亂錦韉之銀鞍恍瑤池之觴酒羌髻髻乎
殿後之鞭非迫旋乎左驂之掉通杓詣之嚴凝冠天梁
之焜耀宜夫擅禁籞之清華為諸賢之待詔若乃禁扃
靖密列署岿堯八駿戒馭羣龍滿朝瞻翠華於雙闕遺

鑿韻於九霄佩繽紛兮瓊瑤冠歲蕤兮蟬貂袖天香之
馥郁隨雲駕之飄颻爾乃縉紳雋彥曰從曰陪公孫大
廷之對相如詞賦之材主父嚴徐之雄辨少孺曼倩之
詼諧或朝奏而暮召或徒步而鼎台朝夕乎論思之獻
揄揚乎盛德之陪雖望之與更生亦相繼於後來咸尻
騁乎長途之驥而下視乎伏櫪之駘吁不榮矣哉然而
武皇好賢固形於跡弛之思與汎駕之諭而多欲之害
不免誇於天馬之歌與襄蹠之鑄雖麒麟天祿盛著於

圖書之府而射熊屬士乃見於列宇之數不其欲賢之
入而閉之門冀士之至而塞之路邪矧驥德之良不尚
於天人三策之老而繞指之柔徒取於曲學阿世之儔
則吾於助也數子其又何尤也昔駿骨之市燕昭有金
臺之崇千里之却文帝惜露臺之費且范蠡之金尚失
報功之誠子期之金亦歎知音之意而世方慕乎漢世
待詔之跡榮羨乎漢世金馬之名美也然金磔之選有
覩於黃門之牧驃騎之舉有得於馬前之輿則武皇金

馬之署詎可以過非而待詔之選又可以厚誣也哉嗚呼建章霧沉未央煙滅三路臺荒涼銅駝荆棘石龍鱗甲飛動於劫灰之塹而茂陵石馬感慨於秋風之客於斯時也吾意天馬之在人間不為龍劍之遁深淵則飛入乎天門之空霄安得起相如之輩挾東方之徒而與訪金門之遺跡也哉

金馬門賦

元鄒選

太白之精房宿之英光芒相射妙合而凝方其麗水沉

星麟洲碎月霞影初分電光乍掣摩尼炯炯不足擬其
容丹砂的的不足喻其色若乃海若獻瑞馮夷效祥不
沙而水自澄不汰而石自揚碎秋菊而有聲屑天桂而
無香錦鱗璀璨橘柚焜煌匪鍊乎鉛汞之仙無藉乎火
劑之良爰篚而筐爰襲而藏泣鬼母於秋郊挽白帝於
西方偕來貢於九牧雜三品於荆揚於時火德方殷炎
風乍扇適滎河之孕瑞溯西極以來獻觀其渥注異產
月窟殊姿虎文隱見龍骨權竒目夾鏡之明臆雙鳧之

飛飲河而水有聲涉道而塵不知朝蹠乎閨風夕次乎

咸池飄若驚鴻矯若遊龍一嘶而膽氣雄再振而冀北

空星流霆發珠灑汗血雄姿逸態難可備述既無圖駿

之工孰寫滎河之骨於是戒冶氏命炎官象天地之為

爐效陰陽之為炭方青白之膠戾忽踴躍以自見慘淡

經營神奇變幻斯須黃龍出於九重不嘶而氣如虹不

動而耳生風陋青玉之驄鄙拳毛之駮蹶乎若奔跋乎

欲前伯樂見之駭其骨之竦王良遇之怪其神之存此

漢人之所謂金馬而立夫未央之門者也是門也闔則象坤闔則象乾將相於此乎出入政令於此乎布宣蓋所以閑天下之邪來天下之賢者也是宜嚴安上書徐樂陳策給事乎其間待詔乎其側此時人所以貴金馬之登而慕金馬之客也吾嘗歷長安訪陳迹至未央之墟而重為金馬惜也是何江都老仲舒之賢淮陽擯汲黯之直而待詔是門者嚴徐之輩啓邊塞之功曼倩之倫談神仙之術遂使海上之童不返塞北之血塗地何

一人之未悟致萬姓之憔悴想金馬於是時恨不為解
廡之當戶觸數子而遠去不然當為金銅之仙墮清淚
之漣漣向非衷由天啓臍悔自噬下輪臺之詔為富民
之計則是馬也得不如晉宮之銅駝流落荆棘之阿如
唐宮之石馬淒涼絕壁之下又安得返吾麗水之淵歸
吾月氏之野哉方今禮以為門仁以為宅匪金之金而
取夫良金之質非馬之馬而取夫良驥之德又况披沙
揀金有大治之精執策臨馬有伯樂之明吾將利吾之

金策吾之驥由乎禮門而求見知於擾龍氏也

金馬門賦

元馮獎翁

未央截葉石渠崔嵬外有廣署東門洞開軼雲煙於縹
緲與日月而徘徊當闕級文石之玉啓鑰響銅環之雷
却長夏而無暑納祥飈而不埃鄰方壺於蓬島邇閭闔
於蕭臺乃有東門之子伯樂是師慨良馬之不乏懼時
人之未知鑄嚴道首山之產效渥注瑤水之姿或鳧芻
而鳳臆或虎脊而龍鬣著隱隱蘭筋之質亭亭竹耳之批

勢歷塊以如躍意乘風而欲馳備倜儻之殊狀詣明廷而獻之詔立署門之外實為索駿之儀此金馬所以得名而待詔者往往於斯也嗟夫燕昭重駿名馬四來漢皇好士麋至竒才妙相求而相應果孰挽而孰推凡器能之卓犖及抱負之瑋瑰顧離蔬而釋屨或棄草而遺菜或識量之宏達或見聞之博該或恤民於寬裕或寓諫於詼諧英氣炳長虹之吐當中耿列宿之排濟濟令儀燦曙色之霞舉洋洋崇論動天顏之霽回置金馬之

名署待玉音於九垓所可知者嚴安徐樂之輩方朔公
孫之儕後來多士數不能枚連尻睢而屬背項者蓋莫
非人品之龍媒想其待詔斯門也曷言曷否斟酌論思
孰可為民生之益孰可為聖聽之裨既經營於丹府將
獻納乎赤墀優游暇日暢叙襟期曳裾縱步容與自怡
徜徉乎厦屋俯仰乎宏規摩挲金鑄撫玩權竒敲銅聲
於駿骨撼削鐵於霜蹄且賞且惜載嗟載咨蓋與立仗
不鳴者無異徒繫而不食之何為反躬自省余才不羈

幸得試天門之步驟非復如鹽坂之低垂金石之心誓
堅守於素節犬馬之報乏輸忠於盛時故自出入是門
之後即有功名建立之基嗚呼金馬待詔千古竒逢第
人心所未慊若公孫曲學而取容欽惟聖代四海文同
奎章炳耀璧府穹窿招延人傑敬禮儒宗上金隄而步
玉堂者德行稱孔門之驥文章推學海之龍以正學為
澤潤生民之本使天下由禮門義路之中顯顯嘉靖皞
皞時雍則金馬得人之盛又何以筭今日之高風

金馬門賦

元劉夢龍

玉關遠域蔥嶺遐陸房星垂耀靈虬委糝鍾為神物駕
風驅馳繫漢武之御極挺英睿之聖資慕龍駒之超逸
想天驥之權竒馳神思於異域欲竒獸之來歸於是詔
巧匠攄良規鍛麗水之竒瑤鼓赤燁之炎輝範儀容於
織悉像形體於毫釐置班門之要劇若立仗而不嘶惟
茲門之改觀緣金馬而名隨吾想夫金馬之門也守匪
虎豹立有駒駉鑄鬣光浮於朱戶磨瞳影射於銅鋪月

殿通輝與銅仙而更弔天關浮瑞恍滎水之出圖魚鱗
映輝而眸不眩獸環撼響而神若驚揚烏東升散驤形
於棖闌素蟾西陟映騰影於觚稜遇雨而疑其揩磨之
色因風而想其鏗鏘之聲蓋驅馳乎君表之過非迫旋
乎左驂之掉孰究夫陰陽闔闢之機莫覩乎牝牡驪黃
之妙是宜接麒麟之揭揭聯白虎之渠渠而千金之臺
屬王之館有不足以儷美而聯芳歟迺有博通碩士經
濟鴻儒主父奏書之懇款相如獻賦之豐腴策對大庭

有公孫之第一諫陳天象應古朔之六符朝奏暮召曰
嚴曰徐歲於茲而待詔偉冠冕之紛如懷忠誠之滿臆
俟朝覲而宣敷暨九重之既闢頒綸旨於朝堂肅鷁行
以前進叙先後而相望對龍墀而稽首得共挹夫清光
吐忠義之肝膽荷嘉納於君王期盡心以補闕將比隆
於虞唐此西漢金馬之門所以彌久而流芳也嗟夫士
之賢良馬之千里馬之奔躡士之跣弛待詔金馬之門
蓋有金臺之意門由馬而愈彰馬賴賢而益美然馬之


相以形固可鍛鍊而為擬士之相以心孰能窺其涯涘
惜武皇有好馬之癖而無識士之智故齊人之多詐或
台鼎之是位以不根之持論乃俳優之是譬若驥足而
匪良亦何殊於下騎也彼其鄴都銅雀聲伎是貯洛陽
銅駝荆棘何易較得失於當年亦粲然而在此也嗚呼
龍門懸水鳳池伊邇僮借地以飛翔回視乎金馬而風
斯下矣

御定歷代賦彙卷七十五

謹案卷七十四第十五頁前一行撫薰風按文苑
英華注撫一作播

卷七十五第二十二頁後六行鉛砌晶瑩而燁燁
刊本瑩訛縈今改

第二十九頁後八行瞻翠華于雙闕刊本闕訛闕
今改



總校官庶吉士臣張能照

校對官編修臣莫瞻業

謄錄監生臣錢敬熙

謄錄監生臣周元濬

欽定四庫全書薈要

集部

御定歷代賦彙卷七十六

七

詳校官候補通政司經歷都祿斌



御定歷代賦彙卷七十六

宮殿

辟雍賦

漢李尤

學既崇三宮既章靈臺司天羣曜彌光大室宗祀布
政國陽辟雍巖巖規矩圓方階序牖闥雙觀四張流水
湯湯造舟為梁神聖班德由斯以匡王公羣后卿士具
集擢羅鱗次差池雜還延忠信之純一兮列左右之貂

辟雍賦

學既崇三宮既章靈臺司天羣曜彌光大室宗祀布

璫三后八蕃師尹羣卿加休慶德稱壽上觴戴甫垂畢
其儀蹌蹌是以乾坤所周八極所要夷戎蠻羌僭耳哀
牢重譯響應抱珍來朝南金大璐玉象犀龜

辟雍賦

以王者風教
之本為韻

唐王履貞

辟雍之裁教化之方辟者象旋圓而不極雍者以流轉
而有常行於歷代創自前王崇此乃理廢之斯亡革斲
剗澆何莫由之而克著化人成俗靡不因茲而允臧公
宮之南靈臺之下赫魏哉以層構規制度於衆寡區別

遠采於虞庠經始不差於周雅闡揚學校旁求儒者溫
良恭敬之士資於父以事師俊造茂異之倫必自朝而
逮野尊卑有秩禮教是崇取乎年均式序不以地高為
雄隨其局貴賤之義自別尚乎齒少長之儀有融然可
以闡皇化彰國風允叶扣鐘之教克成琢玉之功寧止
夫聞天者比於鳴鶴居陸者喻夫漸鴻而已爾其學習
以時詩書興教惟司成是典惟古則是倣詔夏弦春誦
俾民不僭養三老五更俾民知孝惟冑也太子齒矣惟

學也元后視之合語於此釋菜有時以崇其道以尊其師俾百工允理庶績咸熙抑前古之是賴伊茲禮之是持德貞行芳達其名以取譬泉流波注立其義而在茲由是金革可偃淳樸斯返所謂深其流者濬其源茂其末者固其本至矣哉辟雍之旨也大辟雍之教也遠可同乎不騫不崩豈俾夫損之又損

辟雍賦

元楊宗瑞

聖元誕膺天命德洽仁浹三陸晏然萬國臣妾神聖代

作武功赫然天啓聖皇乘龍御天登三邁五繼後光前
斂五福以錫庶民播仁風而胞八埏厭吏治而樂士賤
遠物而寶賢乃尚文德韜武功一制度作辟雍聲教被
乎遐邇隆運軼乎時雍其為制也璧月印海洄風舞漪
方壺屹兮中峙長虹爛兮四垂鬣序秩兮負輪簷甍翊
兮翬飛產三秀兮殿楹羅石鼓兮庭闈八戶闔闢兮乾
坤九楹儼雅兮壁奎鼓鐘頌其於樂振鐸宣其教辭翫
芹藻兮澄碧俯菁莪兮中坻澹文魚兮遊戲肅威鳳兮

來儀乃有髦士碩儒咸集於茲馴良喻兮德驥朋來况
兮總龜紛冠蓋兮後先翳裾佩兮陸離建嘉猷兮二典
擬鴻休兮六詩並追芳兮伊周齊接武兮咎夔含咀績
天之葩效唾明月之珠是皆素丘園之貴而來賓上國
之輝者也至若萬乘戾止六龍馳馭日表淵穆天顏沖
邃百王駿奔千官肅懿以祀以饗禮嚴物備飲食三老
釋奠素王洞洞屬屬濟濟蹌蹌耄倪仰聽而咨嗟億兆
嚮風而樂康在泮宮而宴樂陋魯侯而不齒園橋門而

觀聽視漢世其孰昌乃進諸生論經史研治否推今古
色笑以教匪狎匪怒聖敬日躋恩渥時澍頌聲媿夫韶

夏慚德薄夫湯武於是益窮致治爰發德音誕告多方

簡擢士林思臻霖雨之佐以協宵旰之心集天下之英

林軌行藝於京國鷗鵬奮兮南溟驂騑空兮冀北捫膺

拊心揮雲吐虹來游來歌載歌辟雍歌曰環壁水兮作

辟雍建文治兮啓淳風進多士兮表至公繫令德兮垂

無窮恢弘庠序之制作兮準酌成均之遺蹤固非後世

之所可擬倫兮宜與唐虞成周而等隆不然何以表皇
元萬億年太平之成功

辟雍賦

元王沂

伊辟雍之權輿兮遐哉邈乎歌鎬京之雅詩兮記王制
之遺著靈臺傑兮共峙堯明堂兮同符據坤靈之體勢
兮豐層覆之渠渠高基岫其龐鴻兮棟宇礫磽而離疏
斥丹雘而不御兮惟儉質焉是圖規矩應乎天地兮包
元氣之緼如圓海縈流兮湯湯蔭環林兮扶疎洋洋兮

玄魚醺醺兮白鳥戲廣兮浮深樂我兮皇道藹藹兮多
士纓弁兮森森或弦兮或歌講古兮述今瞻明光兮岿
堯君曾不乎幸臨於是召禮官以具儀協吉日兮辰良
建翠華兮旖旎馳飛龍兮騰驤太常舉兮袞袞和鸞鳴
兮缺缺髦士兮雲集乃幸乎澤宮伯夷兮相儀后夔兮
為工虞業兮維縱賁鼓兮維鏞聲砮隱以砰礚咸合雅
而投頌乃養三老事五更張大侯制五正緝熙以之而
宣揚皇風由是而流行同文王之有聲陋漢明之橫經

蓋崇儒而尚德豈飾治而樂成原善首之所自宜六合之咸亨也乃有兒齒台背之叟相與歌曰於樂辟靡天子之宮文教誕敷四方攸同文教伊何穆如清風適求厥寧適觀厥成臣拜稽首天子之功

辟雍賦

元歐陽玄

皇風清寧人文盛開京師崇天下之本國學萃天下之才粵若稽古爰自蒼姬始號辟雍昉歷代聲名之盛本大射行禮之宮其規創於文武其度講於周公節觀者

於四面壅流水以環中若乃道閭邃嚴義闡軒朗澄源
止而不泥文瀾溢而不蕩肉好適半如壁之象茲乃辟
雍之初所以名狀也或在靈臺或在鎬京靈臺者為文
王所建鎬京者為武王所營茲乃辟雍之初非一地而
同一名也或習射兮觀德或養老兮興孝匪九有之俊
髦軌萬方之則倣茲乃辟雍之初非一事而同一教也
迹其建侯設鵠矩袷圓冠襄尺講事君之敬剡注視立
已之端斯則辟雍之習射天下之盛觀鮐背鶴髮尊傳

隆師祝嘏以膳授几以咨斯則辟雍之養老天下之盛儀閭閻啾啾伴真夷猶覽上國之光華踵賢關之雋游斯則辟雍之養士天下之名流有客聞之曰子於成周之制講之詳矣於異代亦有所徵乎沂觀炎劉治盛繼世臨雍再拜化及四裔要荒萬里就學遣質鼓鐘於論以億萬計於斯時也辟雍亦可謂盛矣愚曰未然子徒慕先漢之遺風若未覩今日之文治我國家聲教之所暨也東踰若木之日津西探崦嵫之月竈南窮火維之

陬北際冰天之溼文軌之治既同弦誦之風四被視寰
海為一辟雍陶同宇為一庠序於是在天則應璧府圖
書之祥在地則產孔廟金芝之瑞葳曲阜之特祠實飛
龍之首歲乃擇成均之師申胄監之制三年而科詔頒
文治蝟日星乎曠世之條風霆乎多士之氣將見自今
以始彼漢之億萬尚敢與今日同年而語哉大抵惟聖
人能盡君師之職惟吾道能並天地而存惟養賢為籲
俊尊帝之大務惟建學為化民成俗之大原嗟此辟雍

屹乎本根固願為今日之賦者續古之頌被之和聲叶
之永言前以光八百年之成周後以開萬億載之皇元

泮宮賦

元 汪克寬

予幼好此竒服兮希前哲而進修曰侯邦之有學兮慕
泮宮而來遊何所獨無竒覽兮羌於此乎久留煥奎壁
之煌煌兮亶屬目而夷猶由義闈之軒朗兮造道閭之
嚴邃瞻崔嵬之層構兮趨廣袤之敞序登倫堂之愷大
兮偉俊髦之是處聆弦誦之琅琅兮侈文物之燦燁歷

重階而拾級兮陟聖域之穹崇叩大成之鉅殿兮闢綺
疏之玲瓏拜素王之遺像兮儼龍卷之儀容想過化存
神之妙兮更千百年而愈隆步前除以徜徉兮覩泮池
之澄碧降殺於辟雍之度兮象玉潢之半壁蓄源泉而
不竭兮涵天光之昭晰茂藻芹之芬郁兮春意生生而
不息繫厥初之有作兮實肇造於蒼姬維東魯之建國
分闡文服之攸施於赫公且之有孫兮纘十有九葉之
丕基樂泮水而翱翔兮載龍旂之委蛇習大射而周旋

兮憬彼獻琛之淮夷序鄉飲而獻酢兮儼穆穆之威儀
多士漸靡而克廣於德兮紛總總而驅馳嘻魯叟之燕
坐兮亦龜蒙曲阜之遺規顧嘉名之昭揭兮盍考譜載
籍而有證也奚毛鄭之異詞兮吾將孰從而取正也抑
稽魯頌之訓詁兮謂東西南瀦水而北繚以周垣故徵
諸鑿沼之形狀兮探名號之本源若王制之推尋兮求
義理之斯存眷言政教之是頒兮溥德意之敷宣究字
書於會意兮蓋分判焉云爾班條章於此學兮俾民眎

則而興起半天子之制兮明尊卑之殊軌雖立論之無
同兮匪垂戾於本始蹇予未有知兮值昌運之文明八
埏春育於元元兮侈黷舍於列城彼魯申之采芣兮又
何足以揄揚於頌聲制禮樂以陶吾民兮固將軼成康
之太平歌曰猗歟泮宮之廓開兮興羣彥而蟬聯抑抒
意於鄙辭兮庶幾續周雅之遺編

孔廟賦

有序

元陶安

至正四年朝議以六事課守令增興學之目遴銓時望

為民師帥由是西河高侯子明以才被選明年守太平
始視事朝服謁先聖廟惟時殿庭弗葺廡敞門偏從祀

位置未合禮度而規制隘狹髹繪昏翳懼弗稱國家致
崇極之意乃建議改作徵學田積逋購材鳩工躬自董
督指畫匠石常臨視終日靡憚勞悴躬祇贊役冬無陰
寒遂復開廣基址大興棟宇塑像嚴華王宮之制其勢
倍蓰疇昔稱江淮之冠矣自侯理郡善政洵施而是舉
尤偉特蔚為斯文盛事蓋圖畫厥職不乃負委任視黃霸

教化潁川文翁建學於蜀同一轍焉昔者泮水之詩頌
美魯僖矧茲新廟落成宜有贊述輒撰孔廟賦用紀成
績昭示無窮雖不敢追媿作者亦古詩之流也賦曰

天昌文運地獻靈基奠素王之奧居闕清廟之弘規法
紫宮乎北極抗陽位乎南離美成功於不日重報本於
明時斯蓋廓乎千古之偏陋聳一邦之崛竒者也睠惟
姑孰開壤江東溪流揚洙泗之波泮林藹鄒魯之風况
當車書之既同校庠之是崇煥經籍其牖民麗日月於

層空詔大成之徽稱仰垂範之玄功匪夫華構魏雄如
雲而翔曷足以尊帝王之師表道德之宗工夫何漫瓦
蘇蝕袞繡塵凝矩度失稽位序無徵玩歲因仍廢不端
興丹虹逝兮梁木壞金爵去兮空觚稜斜持兮旁承岌
岌兮難勝目為駭視心為惕兢苟非神物之呵衛明靈
之倚憑亦將靡然而撓頽然而陵矣物因盡而加飾事
遇終而始成洵美高侯受命天子灑御墨於金屏頒宸
恩於玉璽剖符內京守土南紀振榮光於兩轡撫淳俗

於千里肇當蒞政之期首嚴告至之禮乃盥東榮乃服
深紫瞻堂廡之隘荒省疚懷而不已於是會僚屬詢賢
儒考羣策恢雄圖緡帑久虛粟廩無儲發號屬邑勤徵
歲逋富若川委捷若神輸協良卜吉定方辨隅授全模
於梓匠遴巨木於林虞剗雲根於瑩窟範範埏埴於洪鑪
霏屑噴而瓊靈集大冶躍而金煙噓絕龍瓢之靈雨輾
烏輪於天衢斧斤翩翩繩墨綿綿矯枉而直削腐而堅
曉鍤雲合晝杵雷填勞者忘疲赴者忘旋俄而祕殿傑

聳穹址承甃飛梁奮蛻剛礎蹲獸藥楹複結粉椽騰湊
丹楹列乎瓌材采桶揭乎織繡怒螭掀吻於危甍翔龍
矯首於重霄芝栢藻稅之巧繪山棠荷枿之錯鏤俯深
坤於懸絕突中天而欲驟級層階於東西拱修廊於左
右褰雕簷之雲翼碧瓦燦乎煙鱗瑣牕納景霞壁璘霏
中唐亘砥方墀琢珉風無纖塵雨無微津流紅光於晨
曦飈翠氣於晴旻啓櫺星於黃道棲列宿於朱閣視鑊
之庖設麗牲之碑存侯乃妥靈駿奔有赫宣尼負宸宅

尊以申天天有燕居之儀閭閻侃侃若在朝之容建華
流以垂續端大圭而仰顒享以上丁衣冠肅恭籩俎既

祿爵斯崇載鏗鐘鼓虞業維樅拊以琴瑟間以笙鏞

二公配食傳道得宗列速肖之羣賢秩諸儒其追並像

設祀嚴威儀俱盛絢采色之彰施爛絃璋其輝映彼蘭

桂之性惡莽大夫之符命宜同削於舒零媿江都之醇

三堂榮濂之毓靈指無極於冥徑豫焉而顏洛焉而孟

武也邵張庸奴馬鄭我徽文之紹統參休光於先聖咸

侑祀乎明庭啓衆心之虔敬爾其繚垣四周澄波半壁
杏壇翡翠芹皋森碧跨蒼虹於橋門曳文綃於衛戟登
其堂者恍聞金石絲竹之音踰其闕者洞見黼黻玳瑁
之飾文風振乎草木教澤被乎井邑青山興而鼓舞采
江迴而蕩瀟乾坤交泰而網緼氓庶環觀而悅懌若是
者豈非侯之力邪乃有鴻生英流方領圓袂自賓階升
周旋就位捧手而問曰方今明主御極登三邁五思皇
多士同符乎周文表章六經追蹤於漢武聲名文物充

溢寰宇務菁莪之育才挈斯世於隆古家塾黨庠之相望春誦夏絃之畢舉故建官以闡教豐庖而具羞先生詫宮室之壯麗窮葩藻之雕鏤未聞發揮乎大道不幾馳騁於末流請為我抽其祕而啓其幽遂喻之曰子來前藏修游息素有其地苟廟貌之弗嚴恐禮典之將替今而進德有堂尊經有閣齋廬爰葺圖書有託導以窮理治身之功勛以尊主庇民之學使來遊之彥鼓篋之徒遵義途而步武擴仁宅而安居翺翔禮樂之藪饜飮

雅頌之腴考夏商之忠質嘉唐虞之都俞犧卦明乎消

長麟史寓乎褒誅稽漆書之科斗剔其編之蠹魚玩文

詞於游夏探道與於程朱埽莊列申韓之弊正馬班曄

壽之誣是知作新教化之原以副所任者舍侯其誰乎

問者語塞降階欲辭復授之以詩曰彤彤靈宇高侯所

營流離汗漫輝奕崢嶸於皇文宣集厥大成憲度百王

祀事孔明春秋戰國聖賢道晦晦於一時光於萬代日

月爾曩雷霆爾聳宜此報功制盛王宮配食維賢乃侯

乃公牲膺既充犧象有崇升歌登獻肸蠭豐融高侯曰
嘻訓女髦士我新是役爾立乃志麗澤講習尚勉毋墜
聞命欣躍敢負侯意既崇仞牆亦浚清沼蔭以嘉樹被
以蒼藻洋洋文魚躍躍飛鳥涵翔上下於樂至道魏兮
赫兮禎祥集兮侯之德兮垂無極兮

大成殿賦

元陶安

遭文明之盛世兮流聲教以彌幅幘闢虎闥於壁水兮
示彝倫之所先校庠布乎郡邑兮成在廟而清黼黻乎

大成之禮殿兮嚴報本於文宣承后皇之嘉惠兮詔徽
稱以致崇撫鄒儒之微言兮盡盛德之形容總條貫於
金玉兮翕衆音之始終是曰大成兮視夷惠焉能同著
嘉名而有自兮侔制作乎王宮大江之南曰姑孰兮面
蒼翠之三峰溪流繚乎城邑兮藹洙泗之遺風湛清波
之半壁兮循橋門而泐泐蔚喬蔭於文檜兮發秀色於
蒼芹歲冉冉其屢更兮棟將撓而榱桷蠹澹煙蕪於黃
昏兮恐佳期之不吾遇苟作興之有俟兮亦何恨乎遲

暮思美人而忽見兮羌邂逅於南土駕五馬之翩翩兮
載雲旌而容與指泮水以弭節兮蹇將覲夫靈宇東階
兮肅升酌芳馨兮薦誠華辰塵兮袞龍翳中庭淒兮綠
草生澹觀者兮忘情獨侯心兮靡寧謂天地之廓大兮
惟聖道其服參帝乘龍以撫運兮儒化罔間於朔南宜
崇構以宅尊兮夫豈卑圖之所堪歲月逝而益圯兮將
承宣之我慚萃縉紳以詢兮恢新制而經營協靈辰以
遷主兮命梓人使效能擢良材於鄧林兮輦巨石於巖

局百工續紛以雲集兮隱斤斧之轟轟察屬協心以贊
承兮曾不日而告成隆殿崛其山起兮象紫微之法宮
旅楹植立而絢丹兮飛梁駕乎長虹朱薨采桷翼其如
翬兮仰之高而彌崇信乎不可階而升兮夫何岌業而
從龍椽木蘭而楣辛夷兮煥玉題與金鋪鏤蒼珉以為
礎兮削文杏以為楹敞寬平於赤墀兮納光景於綺疏
碧參差其萬瓦兮躍龍鱗於天衢其勢出類而拔萃兮
蓋將與造物而為徒溘埃風兮排雲類特立兮無羣干

元氣兮網緼類太和兮萃於一身赫奕兮輝煌猶髣髴
兮文章條雲謫而波詭兮象神化之無方具陰陽之闔
闔兮與日月其齊光晨燎設兮獻肴醑妥神居兮啓瑤
戶皇剡剡兮揚靈率雲霓兮來御肅上公兮列侑被赤
紱兮自天而下心悒鬱而未舒兮睠焉不能舍也位門
廉以協制兮建雄宏之廈也圭冕秩於東西兮挹道德
之遺芳五采彰施於五色兮粲繡繪於衣裳列星布乎
朱扉兮爛昭昭其未央士之誠敬有所瞻兮儼素王之

洋洋重曰春秋紛其多故兮傷周綱之久陵嘉尼山之
毓靈兮胡唐虞之弗興環遠轍以振鐸兮慨無人乎我
聆陪祥麟於魯郊兮淚浪浪其忽零明王不作孰宗予
兮歸闡教於遺經開世道之隆平兮示人王之儀刑惟
熙朝之累洽兮躡漢唐而軼三代恢帝德之如天兮鼓
皇風於無外建人極以為標準兮孰若夫子事功之尤
大生民以來未有斯盛兮亦何啻乎羣山之宗岱宜悉
心以興學兮知化原之有在峙壯觀乎江表兮伊斯文

之有賴事畢兮功深丹堊煥兮鴉林登俎籩兮奏八音
吉日上丁兮神所歆嚴齋宮兮集衿佩播弦誦兮遊六
藝雲飛騰兮雨滂沛漸教澤兮被萬世諱曰孔子之道
集大成兮新廟奕奕揭鴻名兮厥高造天鬱嶺嶸兮龍
章當陽儼穆清兮邦之具瞻侯所營兮億載文運日月
其明兮

尊經閣賦

有序

宋
丁椿

寶慶旃蒙作噩余月之次日浚江老圃丁椿舟泊湘陰

矯首江下層閣輪奐質之邦人乃知邑大夫林公新建於環庠且扁曰尊經少焉乘風一登俯視楚國山水於雲霄之上真可以小魯小天下而無望洋之歎矣然則公之惠邑士不其厚乎退而作賦以獻辭曰

伊南湘之故土跨重湖之上形眇山明而水秀號人傑而地靈厥有學宮頽視滄溟新傑閣以撐漢揭巨扁以尊經閣有梯雲攀檻而登眺斯閣且曰四望一空如遊洞庭顧於六籍而何預遂以尊經而為名哉彼豈知闡

造化於八卦恢至道於四代詩歌近以志言禮樂是所
謂大又有一聖操賞罰於筆削以示萬世為賊之大戒
宜後世之所仰遵伊羣言何得而汨壞也迺有異端邪
說諸子百家無父無君之學紛起入佛入老之路太差
蝕杲日於爍火亂大呂於淫哇甚而荀楊之徒亦有純
疵之誇况夫專明於漢而不知同歸之道時文於唐而
誰為諸儒之倡混亂散亡者不得其真狂瀾既倒者莫
東其障嗟聖經之不尊也久矣此先聖所以在川上而

帳也於是闢土地使工師杞梓榱桷兮畢集構榑侏儒
兮各宜雄虹長亘如翬斯飛窮江天於萬里莽湖山於
一機後瞰汨羅之浸前望碧灣之溪引領羣岫者山名
白鶴底柱石流者洲號印龜汀渚錯落林木依稀則何
慊於岳陽之記又何媿於黃鶴之詩人謂先生寄登覽
之至樂豈識先生示學者之攸歸也蓋以其澎湃上流
收覽在目曰蒸曰瀟曰來曰漉吞漣川之一綫合清流
之幾曲由橋口而經此邦下黃陵而奔四瀆蕩蕩茫茫

而學海湯湯浩浩而朝宗豈不猶衆言淆亂而一折諸
聖百川汎濫而萬折於東先生於以明尊經之義學者
於以知統一之功然則今日設庠化邑而作是閣者豈
尋常開學校而誘人以利祿者同哉嗟夫逝者如斯有
本如是後世不得觀瀾之術徒有趨下之弊詞誇倒流
文擅翻水將箒惑於異說之紛推本原於聖經之理先
生不眩鳴絃之名獨得操刀之製於此而一正人心於
此而一明大義迨見學者知所宗師聖門可以徑詣遠

接洙泗之脈絡近啓伊洛之闡捩他時所學見諸行事
將使後世之有賴何止一方之加惠昔人有曰孟氏之
功不下於大禹愚則曰尊經之功不下於孟氏也

觀太學射堂賦

以事變儀存猶
以識禮為韻

唐周存

觀射堂之攸設知射侯之有以非取善於主皮蓋繹心
而正已故王用制之而諸侯是務擇以習焉而射宮觀
美莫不比乎禮樂和其容止將申明於德行必審固夫
弓矢皇家之闡化也稽古議酌前修茲宇既啓茲道惟

休職備乎司射事集乎司表采蘋采芣乃施有度以熊
以豹寔命不猶是用外直諸體內正乎志循聲而發彼
有的得祭而益乎爾地苟斯義罔取或承之羞既於德
可觀則無不利豈徒稱善者五舉正者四誠有國之恒
規而擇賢之盛事曩者天下無虞羯胡生變動搖我區
域辛螫我方面救弊者權必反常以合道靖難者武故
訓人以知戰於是大閱禮行大射義息司馬無祭侯之
事梓人罷棲鴟之職蓋弛張之道因時而沿革之宜可

識方今寰海謚如以無事射堂歸然而獨存綵侯不張
而遠國來屬貢士不習而盛德必敦故夫五帝殊儀三
王異禮咸登太和與至理莫不雍雍而濟濟是知崇樂
非鐘鼓之器立德為正鵠之體也鄙生乎堯日選乎璧
池達弓矢之妙旨偉棟宇之宏規儻斯道而可復庶當
見擇之刑儀

玄武館賦

晉張協

爾乃地勢夷敞既膏且腴環以翠林帶以赤渠尋厥先

之攸基實張氏之舊墟何魏后之周覽遂築館而起廬
既號玄武是曰石樓於是崇墉四匝豐廈詭譎爛若丹
霞皎如素雪璀璨皓盱華瑤四垂接棟連阿崢嶸參差
朱戶青鋪幽闥祕閨於是高樓特起竦峙岌堯飛甍四
注上槩浮霄直亭亭以孤立迎千里之清飈陽扉南啟
陰軒北達春牖左開秋牕右豁仰視雲根俯臨天末木
則楸梓夾路葍蔚如林洪榦十圍修枝百尋

遊華林園賦

宋 裴子野

諒無庸於殿省且棲遲而不事譬籠鳥與池魚本山川
而有思伊暇日而容與時遨遊以蕩志正殿則華光弘
敞重臺則景陽秀出赫奕煥煥陰臨鬱鬱律絕塵霧而上
征尋雲霞而蔽日經增城而斜趣有空龍之石室在盛
夏之方中曾匪風而自慄溪谷則沱潛派別峭峽則險
難壁立積峻竇溜闌干草石苔蘚駁犖叢攢既而登望
徙倚臨遠馮空廣觀眇聽靡有不通

雲堂賦

陳江總

覽黃圖之棟宇規紫宸於太清何面勢之膠葛信不日
之經營仰一時之壯麗跨萬古之威靈吐觸石之奇色
混高堂之舊名若乃三階八戶百拱千楹瑩以玉琇飾
以金英綠芰懸插紅萼倒生於時木葉聲寒壺人唱靜
承露擎虛相風照迴天子乃下輦開宴出豫娛神文懸
日月思革風塵是附鳳之多幸媿屠龍之不真

靈園賦

以仁及禽獸惠
均樵牧為韻

唐徐元弼

代間秦餘地仍周舊俯皇都之近域有文王之古園遙

繁林麓之表遠抱川原之秀沼莫辨於窮流臺靡遺於
屬構往往歸鳥依依顧獸逢時之慶雖鍾思古之懷亦
疚當昔周德資始靈臺是新繚以斯園洽其至仁使芻
牧畢入而獮狝皆馴日以靈知感通於異類大其園見
惠洽於蒸人固以垂耿光本亭育無私公共而有俟勿
亟子來而以築不麇不卵仁叶於羽毛以薪以蒸惠昭
於郊牧覆露功博誠明感深遂天性於物性即人心於
己心白鳥不驚匪觀於狎物非熊已兆奚事於從禽嗟

乎遺址全平餘風可挹想千古之蹤未昧歎三代之英
不及猶欲恣窺臨淹佇立微茫似隔乎煙水邈迤半臨
於井邑見魚躍想坎宮於泉流聞鹿鳴訪陂池於原隰
竟以陰壑蕭條荒榛寂寥無人試問有路通樵悵望風
煙之景沉吟黍稷之苗今國家以崇古為心宗周是繼
且欲儲休祉降嘉惠園苑資靈囿之規宮室擬靈臺之
制是以愛物之誠溥好生之德均仁政潛施於上苑之
內靈德已播於率土之濱然簡弋遊於暇日縱芻詞於

賤臣稽制度於盛王百里猶小嗣風流於前古千載為鄰

九成宮東臺山池賦

有序

唐王勃

九成宮東臺地接開曠面山臨水爾其松峰桂壑紅泉
碧澄金石千聲雲霞萬色侍郎張公雅思沉鬱永懷梓
匠式作仙造業構靈廡仙波成止水之源拳石儼干霄
之狀雖流波覆晉俯藉人機而布葉攢花妙同天繪僕
因暇日濫奉清埃敢抽南畝之才聊叙東山之事云爾

辭曰

若夫金臺妙境玉署仙居酌丹墀之曉暇候青禁之宵
餘驟冲情於月道飛峻賞於煙墟指山楹而思逸懷水
鏡而神虛既而仰瞻頽嶠傍窺黛壑複嶂煙迴攢溪霧
錯偉所用之兼濟想神宮之可作規疊獻於盤龍憲飛
泉於挂鶴覆篋而營巖磴浮芥而環洲萼采拳石於溪
濱蹇纖珠於綺薄萍浮楚江之蒂花轉崑墟之萼岫蘊
玉而虹驚浦涵珠而星落美仁智之同歸信高深之縱

托爾其危岑漏影曲渚留寒高松偃鶴清篠吟鸞被蘭
丘而結佩照蓮服而披冠激坳堂於別淑引膚寸於危
巖若乃嶺橫雞秀波連鳳液花鳥縈紅蘋魚漾碧綠衣
玄衽頽鱗翠額在林藪而同驩望江湖而齊適每至景
沉西粵月下東濱峰深夜久潭靜秋新荷抽水蓋薜引
山茵雪芝獻液露菊傾津嗣南商之逸興有東海之遐
賓保林泉而肆賞混簪紱而同塵何濯纓之有地如攀
桂之無因

集賢院山池賦

唐杜顓

鬱乎羣賢之林有山其秀有池而深幽流澹泞蒼翠嶺
峯千門下隔三殿旁臨引彤庭之佳氣涵碧樹之清陰
連繇芳草遊泳仙禽對石渠之鉛粉會金馬之衣簪宛
雲霞而在目眇江海而為心何扁舟之獨往何倒影之
遠尋懷我魏闕浩爾長吟山池之陰可以清吾襟山池
之所可以狎吾侶涼風忽起白雲時舉步苔岸之周流
藉松溪之積阻邈矣幽興颯然清暑乃登玉巒撫金渚

圖書載暇纓弁以序此焉遊處於茲宴語發菱花而不
能歸攀桂枝而久延佇日落池上雲無處所爾其秋風
既起秋興爰至見藤篠之幽娟弄石泉之明媚禁林餘
雨增曲雷之華清御苑晴煙借遙巖之積翠是以洗雪
煩想優游雅思嗟乎山中人兮猶未識池上蛟兮焉可
得顧蘭芳與菊滋從此賞兮無極

太平公主山池賦

唐宗之問

粵若公主誕生皇家太平徵郡國以選號叶時雍之美

名孚靈娥之秀彩輝婺女之淳精虹美電媚蘭香玉清
稟金后之玄訓係列聖之聰明厭綺羅與絲竹愛瑤池
及赤城構僊山兮既畢侔造化之神術其為狀也攢怪
石而岑峯其為異也含清氣而蕭瑟列海岸而爭聳分
水亭而對出其東則峰崖刻劃洞穴縈迴乍若風飄雨
灑兮移鬱島又似波沉浪息兮見蓬萊圖萬重於積石
匿千嶺於天台荆門揭起兮壁峻少室叢生兮劒開削
成秀絕蓮華之覆高掌獨立窈窕神女之戲陽臺爾其

樵溪釣浦茅堂菌閣祕僊洞之瑤膏隱山家之場藿煙
岑水涯繚繞逶迤翠蓮瑤草的皪紛披映江潯而爛爛
浮海上而纍纍迺之果與衡霍豈吾人之所為向背重
複參差反覆翳蒼蒙龍含青吐紅陽崖奪景陰壑生風
竒樹抱石新花灌叢向若天長地久兮苔蘚合古往今
來兮林澗空始燕秦而開徑訪靈藥乎其中其西則翠
屏蘄巖山路詰曲高閣翔雲丹巖吐綠惚兮恍涉弱水
兮至崑崙杳兮宜乘龍梁兮向巴蜀壯岷嶓兮連屬鬱

氛氲兮斷續巖虛兮谷峻藏清兮蓄韻含珠兮蘊玉衆
彩兮明潤芳園暮兮白日沉爽氣浮兮黛壑深風泉活
活兮鳴石葛藟青青兮蔓岑羅八方之奇獸聚六合之
珍禽別有複道三襲平臺四注跨渚兮交林蒸雲兮起
霧駕鸞水兮鳳凰樓文虹橋兮彩鷁舟山池成兮帝子
遊試一望兮消人憂召七賢集五侯棹浦曲席巖幽鳴玉
佩兮登降列金觴兮獻酬未窮觀而極覽忽雲散而風
流於是乎上客既旋重扃嚴閉榜童儼而齊發綵女分

而為衛牽水葉兮張水嬉摘山花兮詠山圻燕姬荆豔
兮代所稀鳳舞鸞歌兮儼欲飛披煙弄月兮宵未歸桂
枝清霧兮濕羅衣奕奕濟濟夜旋玉卮隱隱崇崇朝趨
帝宮銀鑪翕習煙生霧集絳節繽紛揚光吐文行軒即
水去馬騰雲鏘鏘翼翼兮馳丹闕超超遙遙兮向紫氣
寵極兮慈掌情勤兮幽賞戀宸宸兮出入憶幽山兮來
往採朱萼兮山之側步蘭庭兮候顏色掇綠蘋兮于澗
潦宜室家兮叶仇好既而貞心內潔淑則遠傳詎談者

聞之而必勸，缺薄者聞之而凜然。况復淮王招隱，秦主
隨僊，弄紫房之琴瑟，驅碧落之風煙，賓屈宋於珠履，引
鄒枚於玳筵。秋葉飛兮散紅樹，春苔生兮覆綠泉。春秋
寒暑兮歲榮落，林巒沼沚兮日芳鮮。吾君永保南山壽，
車騎往來千萬年。

御定歷代賦彙卷七十六